

ANTEPROXECTO DE LEI DE ARTESANÍA DE GALICIA

EXPOSICIÓN DE MOTIVOS

A Constitución Española, no seu artigo 130.1, dispón que os poderes públicos atenderán á modernización e desenvolvemento de todos os sectores económicos, entre os que se cita expresamente á artesanía, co fin de equiparar o nivel de vida de todos os españois.

Pola súa parte, a Comunidade Autónoma de Galicia ten atribuída a competencia exclusiva en materia de artesanía no artigo 27.17 do Estatuto de autonomía de Galicia. No exercicio desta competencia ditouse a Lei 1/1992, do 11 de marzo, de artesanía de Galicia.

Dado o tempo transcorrido dende a súa aprobación, xurde a necesidade de adecuar esta regulación á nova realidade do sector artesanal, nun marco xurídico axeitado que manteña e promova a súa importancia social, cultural, identitaria e económica e que incremente a súa profesionalización e competitividade, apostando por un sector forte e perdurable no tempo.

A artesanía do século XXI é mixtura de tradición e innovación, de arraigo e modernización, de sostibilidade e progreso; pero, sobre todo, a artesanía galega son os nosos artesáns e artesás, creadores de pezas únicas e transmisores dos oficios e valores artesanais ás futuras xeracións, os que sitúan a actividade artesanal como fonte de desenvolvemento cultural, social, turístico e económico.

A actividade artesá non só se traduce en resultados puramente materiais senón que exerce ademais certa pedagogía de carácter social, en canto transmite uns valores e contidos culturais arraigados na sociedade e que debemos apreciar e estimular. Igualmente, é un valor diferenciador fronte aos sistemas de produción industrial posto que supón un xeito de entender a empresa altamente comprometido cos aspectos emocionais, ecolóxicos e culturais das nosas tradicións.

Nos últimos anos novos e novas profesionais estanse a incorporar ás actividades artesanais xerando un emprego especializado e converténdose nun dos maiores sectores catalizadores de emprendedores e, moi especialmente, de emprendedoras, ademais dun factor importante no asentamento e desenvolvemento da poboación en zonas rurais.

Sobre a base destas consideracións, resulta necesaria unha actualización e modernización da normativa reguladora da artesanía na nosa comunidade autónoma que impulse a artesanía cara ao futuro como unha actividade económica sostible e xeradora de emprego vencellada ao territorio.

A lei consta de catorce artigos agrupados en cinco capítulos, dúas disposicións transitorias, unha disposición derogatoria e dúas disposicións derradeiras.

O Capítulo I, baixo a rúbrica de “disposicións xerais” (artigos 1 a 3), establece o obxecto e fins da lei e o seu ámbito de aplicación e incorpora un artigo específico de conceptos que contribúen a unha maior comprensión do texto legal. En concreto, actualízase o concepto de artesanía, posibilitando o emprego de maquinaria auxiliar ou doutro tipo de ferramentas, dixitais ou analóxicas, sempre que a intervención persoal e o coñecemento técnico sexan determinantes no resultado final do proceso artesanal.

O Capítulo II, baixo a rúbrica de “ordenación e regulación do sector artesanal galego” (artigos 4 a 10), regula as distintas modalidades de actividades artesanais e a Relación de Actividades Artesanais definida como o conxunto sistematicamente ordenado de actividades económicas artesanais, clasificadas conforme á Clasificación Nacional de Actividades Económicas. Así mesmo, regula os recoñecementos oficiais da condición de persoa artesá, obradoiro artesán, mestra artesá e mestre artesán e asociación e federación artesanal. E, por último, inclúe o recoñecemento de puntos de especial interese artesanal coa dobre finalidade de promover os territorios e a súa artesanía e de recuperar, conservar e divulgar as manifestacións artesanais de especial singularidade.

O Capítulo III, baixo a rúbrica “marca Artesanía de Galicia”, consta dun único artigo (artigo 11). A marca Artesanía de Galicia é recoñecida polas persoas usuarias como un valor engadido e polas persoas consumidoras como unha imaxe de calidade e de prestixio dos produtos. Constitúe unha das principais fortalezas do sector artesanal galego, polo que debe ser aproveitada para impulsar o posicionamento nacional e internacional da artesanía e para acadar unha maior promoción e comercialización do produto artesán galego.

A lei recoñece e posiciona a marca Artesanía de Galicia, propiedade da Xunta de Galicia, como un distintivo que identifica aos obradoiros artesanais da Comunidade Autónoma de Galicia e acredita que o produto que porte o distintivo da marca elaborouse nun obradoiro artesán inscrito no Rexistro Xeral de Artesanía de Galicia.

O Capítulo IV, baixo a rúbrica “Comisión Galega de Artesanía e Rexistro Xeral de Artesanía de Galicia” (artigos 12 e 13), regula a Comisión Galega de Artesanía como un órgano de carácter consultivo da Administración autonómica en materia de artesanía así como de participación e representación do sector artesanal da Comunidade Autónoma de Galicia.

A lei mantén o Rexistro Xeral de Artesanía de Galicia, que ten natureza administrativa, carácter público e gratuíto e é único para a Comunidade Autónoma de Galicia. Defínese a súa finalidade como un instrumento para o coñecemento por parte da administración da realidade do sector, non só para o control dos recoñecementos administrativos da actividade artesanal senón tamén para a mellora e a planificación e a coordinación das actuacións dirixidas á súa promoción e desenvolvemento.

O Capítulo V, baixo a rúbrica “Fundación Pública Artesanía de Galicia” consta dun único artigo (artigo 14).

A Fundación Pública Artesanía de Galicia contribúe á promoción e ao desenvolvemento do sector artesanal galego, apoiando ós oficios artesanais máis tradicionais vinculados ao noso territorio e, ao mesmo tempo, apostando pola innovación e polo uso das novas ferramentas tecnolóxicas, pola formación profesionalizada, pola divulgación e pola comercialización.

As disposicións que integran a parte final da lei teñen por obxecto adecuar a situación preexistente á nova situación xurídica creada pola presente lei.

A lei foi obxecto de consulta pública previa, e información pública e audiencia.

A lei axustase aos principios de boa regulación contidos no artigo 37.a) da Lei 14/2013, do 26 de decembro, de racionalización do sector público autonómico de Galicia. As medidas previstas nela responden á satisfacción de necesidades de interese xeral coa debida proporcionalidade, eficacia e eficiencia e recóllense na norma os obxectivos perseguidos a través dela e a súa xustificación tal e como esixe o principio de transparencia.

Por todo o exposto, o Parlamento de Galicia aprobou e eu, de conformidade co artigo 13.2 do Estatuto de autonomía de Galicia e co artigo 24 da Lei 1/1983, do 22 de febreiro, de normas reguladoras da Xunta e da súa Presidencia, promulgo en nome do rei a Lei de Artesanía de Galicia.

CAPÍTULO I

Disposicións xerais

Artigo 1. *Obxecto e fins*

A presente lei ten por obxecto a ordenación, promoción, fomento, modernización e profesionalización do sector artesanal na Comunidade Autónoma de Galicia, co fin de promover o desenvolvemento da artesanía como actividade económica sostible, garantir a protección das súas diversas manifestacións e manter canles de cooperación e colaboración entre o sector artesanal galego e a Administración autonómica de Galicia para a procura dos seguintes obxectivos:

- a) A conservación e a recuperación das manifestacións artesanais máis tradicionais de Galicia para garantir a súa pervivencia e desenvolvemento.
- b) A potenciación da expansión e o deseño da artesanía contemporánea.

- c) A inclusión de novas actividades artesanais e a incorporación de novas vocacións que consoliden no tempo o sector artesanal galego e garantan o relevo xeracional.
- d) A divulgación e a posta en valor do patrimonio artesanal no ámbito económico, social, cultural e turístico.
- e) O impulso da comercialización e a mellora da rendibilidade e da competitividade da artesanía no mercado, coa progresiva adaptación do sector artesanal á evolución tecnolóxica e dixital e ás diferentes canles de comercialización físicas e dixitais.
- f) A profesionalización do sector artesanal mediante a formación continua e especializada.
- g) A promoción da creatividade, calidade e innovación na produción artesanal galega e a creación de sinerxias con outros sectores produtivos.
- h) A transmisión dos valores e o compromiso coa difusión, promoción e pedagogía da artesanía como práctica creativa.
- i) O fomento da responsabilidade social e medioambiental e o desenvolvemento local e a dinamización do rural como factores de éxito do sector artesanal.

Artigo 2. *Ámbito de aplicación*

1. A presente lei será de aplicación ás actividades artesanais, ás persoas artesás, aos obradoiros artesáns e ás asociacións e federacións profesionais e empresariais artesanais definidos no artigo 3 desta lei.
2. Quedan excluídas do ámbito de aplicación da presente lei as producións exclusivamente mecanizadas e a artesanía alimentaria, que se rexerán pola súa propia normativa.

Artigo 3. *Conceptos*

Para os efectos da presente lei entenderase por:

1. Artesanía:

Toda actividade económica que supoña o deseño, a creación, a produción, a transformación, a restauración ou a reparación de bens de valor artístico ou



tradicional e de bens de consumo, así como a prestación de servizos derivada daquelas, sempre e cando se realicen ou obteñan mediante procesos nos que a intervención persoal e o coñecemento técnico da persoa ou persoas que participan nelas constitúan o factor determinante para a obtención do produto final.

O produto ou servizo final debe ter un carácter individualizado e diferenciado que non se acomode a unha produción industrial ou de servizos totalmente mecanizada, en series ou onde a intervención do factor humano non sexa primordial.

A actividade artesanal pode levar implícita o emprego de ferramentas dixitais ou analóxicas, de maquinaria auxiliar e doutros activos sempre e cando o seu uso forme parte dalgún dos procesos de elaboración dos produtos ou servizos e non substitúa por completo a intervención persoal para a obtención do produto ou servizo final.

2. Persoa artesá:

Toda persoa física que realiza unha actividade recollida na Relación de Actividades Artesás de Galicia e que, mediante as súas habilidades, destrezas e capacitacións técnicas, pode transformar a materia prima nun produto final de calidade de acordo co previsto no artigo 3.1 desta lei.

Este recoñecemento outorgarase a través da carta de artesá e artesán, que se regula no artigo 6 desta lei.

3. Obradoiro artesán:

Toda persoa física ou xurídica legalmente constituída e que forme unha unidade económica, ubicada no territorio da Comunidade Autónoma de Galicia e realice unha actividade comprendida na Relación de Actividades Artesás de Galicia nos termos establecidos no artigo 3.1 desta lei.

Este recoñecemento outorgarase a través do título de obradoiro artesán, que se regula no artigo 7 desta lei.

4. Mestra artesá e mestre artesán:

Toda persoa que desempeña ou desempeñou unha actividade comprendida na Relación de Actividades Artesás de Galicia de xeito divulgativo ou

profesional que posúa un gran dominio técnico do oficio, experiencia, méritos e mestría exercida na busca continua da excelencia.

Este recoñecemento outorgarase a través da carta de mestra artesá e mestre artesán, que se regula no artigo 8 desta lei.

5. Asociacións e federacións artesanais:

Toda asociación e federación profesional e empresarial artesanal de Galicia legalmente constituída, con ou sen ánimo de lucro, inscrita nos rexistros correspondentes, que agrupe maioritariamente a obradoiros artesáns ou a asociacións de obradoiros artesáns, que desenvolva a súa actividade e teña o seu domicilio na Comunidade Autónoma de Galicia, sempre que nos seus estatutos se establezan como fins a protección, a comercialización, o fomento e a divulgación da artesanía galega ou outros fins de interese para o sector.

Este recoñecemento outorgarase a través da condición de asociación e federación artesanal, que se regula no artigo 9 desta lei.

6. Establecementos de venda de Artesanía de Galicia:

Todo establecemento de venda de Artesanía de Galicia, calquera que sexa a súa canle de comercialización, que cumpra cos requisitos establecidos na normativa reguladora do uso da marca Artesanía de Galicia.

CAPÍTULO II

Ordenación e regulación do sector artesanal galego

Artigo 4. Modalidades das actividades artesanais

1. As actividades artesanais clasifícanse nas seguintes modalidades por razón do seu contido principal:

a) Artesanía de carácter tradicional: pezas artesás realizadas con técnicas tradicionais conservando os seus trazos etnográficos e de identidade.



b) Artesanía artística ou de creación: obras ou traballos realizados con técnicas artesanais e cuxa peculiaridade son a creación, a singularidade e a innovación.

c) Artesanía de produción de bens de consumo: pezas producidas para satisfacer unha necesidade determinada.

d) Artesanía de servizos: actividades artesanais de reparación e de mantemento de produtos artesanais ou históricos, así coma os que presten servizos persoais ou complementarios a algunha actividade das recollidas na Relación de Actividades Artesás de Galicia.

Regulamentariamente, poderanse establecer outras modalidades de clasificación das actividades artesanais.

2. As actividades artesanais poderán clasificarse en subsectores económicos cuxa definición, ampliación ou modificación establecerase por orde da consellería que ostente as competencias en materia de artesanía.

3. A adscrición das actividades artesanais a unha ou a varias modalidades ou, no seu caso, a subsectores económicos levarase a cabo segundo a Relación de Actividades Artesás de Galicia.

Artigo 5. Relación de Actividades Artesás de Galicia

1. A Relación de Actividades Artesás de Galicia é o conxunto sistematicamente ordenado de actividades económicas artesanais, clasificadas conforme á Clasificación Nacional de Actividades Económicas. Cada actividade económica indicará as diferentes modalidades definidas no artigo 4 desta lei nas que se encadra.

2. A Relación de Actividades Artesás terá o contido, a estrutura e a sistemática que se determine regulamentariamente e será elaborada e modificada mediante orde da consellería que ostente as competencias en materia de artesanía, á proposta da Comisión Galega de Artesanía.

3. A Relación de Actividades Artesás inscribírase no Rexistro Xeral de Artesanía de Galicia segundo o disposto no artigo 13 desta lei.

Artigo 6. Recoñecemento oficial da condición de persoa artesá: carta de artesá e artesán

1. Para os efectos desta lei, o recoñecemento oficial pola Administración autonómica da condición de persoa artesá outorgarase mediante a expedición da carta de artesá e artesán pola consellería que ostente as competencias en materia de artesanía, á proposta da Comisión Galega de Artesanía, de acordo co procedemento establecido regulamentariamente.

2. A carta de artesá e artesán ten carácter voluntario, non constitúe un requisito para o exercicio da actividade artesanal e non exixe do cumprimento das obrigas legalmente establecidas para o exercicio da actividade económica.

Non obstante o anterior, a carta de artesá e artesán é un requisito previo e obrigatorio para solicitar o recoñecemento oficial da condición de obradoiro artesán ou o recoñecemento oficial da condición de mestra artesá e mestre artesán.

3. A carta de artesá e artesán outorgarase ás persoas artesás definidas no artigo 3.2 desta lei que o soliciten e reúnan os requisitos que se establezan regulamentariamente.

4. A carta de artesá e artesán ten unha vixencia indefinida. Non obstante, perderá a súa validez no caso de renuncia ou falecemento do titular.

5. A carta de artesá e artesán inscribírase no Rexistro Xeral de Artesanía de Galicia segundo o disposto no artigo 13 desta lei.

Artigo 7. Recoñecemento oficial da condición de obradoiro artesán

1. Para os efectos desta lei, o recoñecemento oficial pola Administración autonómica da condición de obradoiro artesán outorgarase mediante a expedición do título de obradoiro artesán pola consellería que ostente as competencias en materia de artesanía, a proposta da Comisión Galega de Artesanía, de acordo co procedemento establecido regulamentariamente.

2. O título de obradoiro artesán ten carácter voluntario e non constitúe un requisito para o exercicio da actividade artesanal.

3. O título de obradoiro artesán outorgarase aos obradoiros artesanais definidos no artigo 3.3 desta lei que reúnan os seguintes requisitos:

a) Que a persoa responsable da actividade produtiva estea en posesión da carta de artesá e artesán e que sexa a que dirixa ou controle a totalidade do proceso produtivo, asegurando o carácter artesán do produto.

b) Que a persoa titular da unidade económica estea dada de alta no Imposto de Actividades Económicas e no réxime que corresponda da Seguridade Social, ademais de estar ao día no pagamento das obrigas tributarias coa AEAT, coa Seguridade Social e coa Administración pública da comunidade autónoma.

c) Que o número de persoas traballadoras empregadas non exceda de dez.

Excepcionalmente, a Comisión Galega de Artesanía, en atención á natureza da actividade desenvolvida, poderá propoñer obradoiro artesán aquel que, aínda superando o número de persoas traballadoras establecidas no parágrafo anterior, cumpra os outros requisitos previstos.

4. Tamén poderán obter o título de obradoiro artesán aquelas unidades de carácter cooperativo ou asociativo que se dediquen á elaboración e comercialización de produtos artesanais sempre que cumpran os requisitos do apartado anterior e os que se establezan regulamentariamente.

5. O título de obradoiro artesán ten unha vixencia de 5 anos desde a data da súa expedición, coa posibilidade de renovación de acordo co procedemento establecido regulamentariamente sempre que se manteñan os requisitos establecidos no apartado 3. Perderá a súa validez:



a) Por baixa voluntaria, por xubilación, por falecemento da persoa artesá responsable da actividade produtiva ou titular da actividade ou por extinción da personalidade xurídica da empresa.

b) Por incumprimento ou non mantemento dos requisitos establecidos para o seu outorgamento, previo expediente instruído ao efecto á proposta da Comisión Galega de Artesanía nos termos establecidos regulamentariamente.

6. A obtención do título de obradoiro artesán supón os seguintes beneficios:

a) Participar nas convocatorias de concesión de subvencións e de axudas relacionadas co exercicio da actividade artesanal que sexan convocadas pola consellería competente en materia de artesanía, así como nos procedementos de concesión directa.

b) Participar nos eventos de interese artesanal organizados ou financiados pola consellería competente en materia de artesanía nos termos establecidos regulamentariamente.

c) Ser beneficiario do uso da marca Artesanía de Galicia de conformidade co disposto na normativa reguladora da marca.

d) Calquera outro beneficio que se estableza regulamentariamente.

7. O título de obradoiro artesán inscribírase no Rexistro Xeral de Artesanía de Galicia segundo o disposto no artigo 13 desta lei.

Artigo 8. Recoñecemento oficial da condición de mestra artesá e mestre artesán: carta de mestra artesá e mestre artesán

1. Para os efectos desta lei, o recoñecemento oficial pola Administración autonómica da condición de mestra artesá e mestre artesán outorgarase mediante a expedición da carta de mestra artesá e mestre artesán a proposta da Comisión Galega de Artesanía, previa convocatoria pública da

consellería que ostente as competencias en materia de artesanía de acordo co procedemento establecido regulamentariamente.

2. A carta de mestra artesá e mestre artesán é unha distinción persoal e intransferible que será outorgada a aquelas persoas que fixeron dunha actividade artesanal a súa profesión para darlle continuidade a un ou a máis oficios artesanais de acordo co disposto no artigo 3.4 desta lei.

3. A carta de mestra artesá e mestre artesán ten carácter voluntario e non constitúe un requisito para o exercicio da actividade artesanal.

4. Distínguense dúas modalidades:

a) Carta de mestra artesá e mestre artesán profesional: esta modalidade recoñece a maestría no exercicio dun oficio. Para o seu recoñecemento son indispensables os seguintes requisitos:

1º Estar en posesión da carta de artesá ou artesán.

2º Ter máis de 20 anos de exercicio do oficio.

3º Exercer ou ter exercido o oficio nun obradoiro artesán propio ou por conta allea.

4º Presentar 3 cartas de apoio nos termos establecidos regulamentariamente.

b) Carta de mestra artesá e mestre artesán divulgativo: esta modalidade recoñece a capacidade de transmisión dos coñecementos do oficio mediante a docencia ou outro medio pedagóxico. Para o seu recoñecemento son indispensables os seguintes requisitos:

1º Estar en posesión da carta de artesá ou artesán.

2º Ter máis de 20 anos de experiencia divulgativa.

3º Presentar 3 cartas de apoio nos termos establecidos regulamentariamente.

5. A carta de mestra artesá e mestre artesán ten unha validez permanente. Non obstante, perderá a súa validez no caso de renuncia ou falecemento do titular.

6. A carta de mestra artesá e mestre artesán inscribírase no Rexistro Xeral de Artesanía de Galicia segundo o disposto no artigo 13 desta lei.

Artigo 9. Recoñecemento oficial de asociacións e federacións artesanais

1. Para os efectos desta lei, o recoñecemento oficial pola Administración autonómica da condición de asociación e federación profesional e empresarial artesanal, no ámbito da Comunidade Autónoma de Galicia, outorgarase pola consellería que ostente as competencias en materia de artesanía, a proposta da Comisión Galega de Artesanía, de acordo co artigo 3.5 desta lei e co procedemento establecido regulamentariamente.

2. A obtención do recoñecemento oficial de asociación e federación artesanal supón os seguintes beneficios:

a) Participar nas convocatorias de concesión de subvencións e axudas relacionadas co desenvolvemento dos seus fins e que sexan convocadas pola consellería competente en materia de artesanía, así como nos procedementos de concesión directa.

b) Participar nos eventos de interese artesanal organizados ou financiados pola consellería competente en materia de artesanía nos termos establecidos regulamentariamente.

c) Calquera outro beneficio que se estableza regulamentariamente.

3. As asociacións e federacións profesionais e empresariais artesanais de Galicia inscribíranse no Rexistro Xeral de Artesanía de Galicia segundo o disposto no artigo 13 desta lei.

Artigo 10. Puntos de especial interese artesanal

1. Poderanse declarar puntos de especial interese artesanal co fin de activar e promover os territorios e a súa artesanía así como recuperar, conservar e divulgar as manifestacións artesanais de especial singularidade.

2. Distínguense dúas categorías:

a) Zona de especial interese artesanal:

Terá a consideración de zona de especial interese artesanal o territorio formado por un ou varios municipios ou parte dos mesmos que conte cun colectivo artesanal activo e homoxéneo onde os oficios propios estean relacionados co territorio, o procedemento e o produto, ou que teña unha tradición artesanal de longo percorrido ou de recoñecemento histórico.

b) Obradoiro de especial interese artesanal:

Terá a consideración de obradoiro de especial interese artesanal o obradoiro definido no artigo 3.3 desta lei que veña desenvolvendo a súa actividade cun marcado interese cultural e territorial e no que concorran especiais características de tradición, innovación, produción ou comercialización.

3. O recoñecemento de puntos de especial interese artesanal efectuarase pola consellería competente en materia de artesanía previo informe preceptivo da Comisión Galega de Artesanía e de acordo co procedemento establecido regulamentariamente.

4. Os puntos de especial interese artesanal inscribíranse no Rexistro Xeral de Artesanía de Galicia segundo o disposto no artigo 13 desta lei.

CAPÍTULO III

Marca Artesanía de Galicia

Artigo 11. Marca Artesanía de Galicia

1. A marca Artesanía de Galicia, propiedade da Xunta de Galicia, é un distintivo que identifica aos obradoiros artesáns da Comunidade Autónoma de Galicia e acredita que o produto que porte o distintivo da marca se elaborou nun obradoiro artesán inscrito no Rexistro Xeral de Artesanía de Galicia.

2. O distintivo da marca Artesanía de Galicia ten por finalidade:
 - a) Dotar á artesanía galega dunha imaxe que a distinga e identifique a súa procedencia.
 - b) Promover a difusión da artesanía de Galicia e fomentar a súa comercialización.
 - c) Protexer e manter o prestixio das/os profesionais da artesanía de Galicia e das súas obras.
 - d) Informar ás persoas consumidoras sobre a produción artesanal.
 - e) Apoiar os puntos de venda ofrecendo a información necesaria que a diferencie no mercado.
3. A concesión, o uso e o control da marca Artesanía de Galicia regularase por orde da consellería competente en materia de artesanía.
4. Sen prexuízo do anterior, a consellería competente en materia de artesanía poderá crear outros distintivos que acrediten a calidade e a identificación do sector artesanal galego nos termos establecidos regulamentariamente.

CAPÍTULO IV

Comisión Galega de Artesanía e Rexistro Xeral de Artesanía de Galicia

Artigo 12. Comisión Galega de Artesanía

1. A Comisión Galega de Artesanía é o órgano de carácter consultivo da Administración autonómica en materia de artesanía, así como de participación e de representación do sector artesanal da Comunidade Autónoma de Galicia.
2. A Comisión Galega de Artesanía queda adscrita á consellería que ostente as competencias en materia de artesanía.



3. A Comisión Galega de Artesanía está formada por representantes da Administración autonómica e do sector artesanal e a súa composición será paritaria.

Os representantes da Administración autonómica e do sector artesanal inscritos na correspondente sección do Rexistro Xeral de Artesanía serán designados nos termos que se establezan regulamentariamente.

4. As funcións da Comisión Galega de Artesanía son as seguintes:

a) Propoñer a inclusión e a modificación de actividades na Relación de Actividades Artesás de Galicia.

b) Propoñer a expedición das cartas de artesá e artesán.

c) Propoñer a expedición e perda de validez dos títulos de obradoiro artesán.

d) Propoñer a expedición das cartas de mestras artesás e mestres artesáns.

e) Propoñer o recoñecemento da condición de asociación e federación profesional e empresarial artesanal.

f) Propoñer á Administración autonómica disposicións e actuacións dirixidas ao fomento, á protección, á promoción e á comercialización da artesanía.

g) Calquera outra función que se determine nesta lei ou se estableza regulamentariamente.

Artigo 13. *Rexistro Xeral de Artesanía de Galicia*

1. O Rexistro Xeral de Artesanía de Galicia, de natureza administrativa e carácter público e gratuito, é único para a Comunidade Autónoma de Galicia e está adscrito á Consellería competente en materia de artesanía a través do centro directivo competente na materia.

2. O Rexistro Xeral de Artesanía de Galicia ten por finalidade o coñecemento por parte da administración da realidade do sector, non só para o control dos recoñecementos administrativos da actividade artesanal senón tamén para a mellora e a planificación e a coordinación das actuacións dirixidas á súa promoción e desenvolvemento.

3. Os datos contidos nos recoñecementos outorgados segundo o disposto nesta lei inscribíranse de oficio no Rexistro Xeral de Artesanía de Galicia. Os ditos datos, a excepción dos de carácter persoal, teñen carácter público e estarán dispoñibles no portal web da Administración autonómica.

4. O Rexistro Xeral de Artesanía de Galicia consta, como mínimo, das seguintes seccións:

- a) Carta de artesá e artesán.
- b) Título de obradoiro artesán.
- c) Carta de mestra artesá e mestre artesán.
- d) Asociacións e federacións profesionais e empresariais artesanais.
- e) Relación de Actividades Artesás de Galicia.
- f) Establecementos de venda de Artesanía de Galicia.
- g) Puntos de especial interese artesanal.

5. Os procedementos de inscrición, baixa ou modificación no Rexistro Xeral de Artesanía de Galicia así como a organización das seccións das que conste serán obxecto de desenvolvemento regulamentario.

6. Procederáse á cancelación de oficio nos supostos de perda da validez dos recoñecementos oficiais de acordo co previsto nesta lei e no seu desenvolvemento regulamentario.

CAPÍTULO V

Fundación Pública Artesanía de Galicia

Artigo 14. Fundación Pública Artesanía de Galicia

A Fundación Pública Artesanía de Galicia é unha fundación de interese galego, sen ánimo de lucro, con personalidade xurídica e patrimonio propio que ten por finalidade dotar ao sector artesanal dunha infraestrutura especializada para que poida desenvolver programas de asistencia, formación, innovación, comercialización e calquera outro aspecto inherente á cultura dos oficios artesanais de Galicia.

Disposición transitoria primeira. *Cartas de artesá e artesán*

As cartas de artesá e artesán que estean vixentes no momento da entrada en vigor da presente lei pasarán a ter carácter indefinido de conformidade co artigo 6 desta lei.

Disposición transitoria segunda. *Cartas de mestra artesá e mestre artesán*

Todas as cartas de mestra artesá e mestre artesán anteriores á entrada en vigor desta lei perderán a súa vixencia.

Disposición derogatoria única. *Derrogación normativa*

1. Queda derogada a Lei 1/1992, do 11 de marzo, de Artesanía de Galicia e cantas disposicións de igual ou inferior rango se opoñan ao previsto nesta lei.

2. Manteñen a súa vixencia, no que non resulte incompatible coa presente lei, as disposicións de carácter xeral ditas en materia de artesanía en tanto non entren en vigor as disposicións de desenvolvemento da presente lei que as substitúan.

Disposición derradeira primeira. *Habilitación para o desenvolvemento regulamentario*

A Xunta de Galicia, no prazo dun ano, ditará as disposicións necesarias para o desenvolvemento e execución da presente lei.

Disposición derradeira segunda. *Entrada en vigor*



XUNTA
DE GALICIA

VICEPRESIDENCIA SEGUNDA E
CONSELLERÍA DE ECONOMÍA,
EMPRESA E INNOVACIÓN



Xacobeo 21-22

A presente lei entrará en vigor aos 20 días da súa publicación no *Diario Oficial de Galicia*.